

Cualchi note su la vite di Marzi Strassolt

RAIMONT STRASSOLT

1. Formazion in ambient plurilengâl. Marzi Strassolt, nassût a Gurize ai 23 di Dicembar dal 1939, al è cressût intun ambient familiâr fuartement tri plurilengâl. So pari Carli, uficiâl de marine militâr taliane, al jere di marilenghe todescje; cheste e jere la lenghe dominante e tradizional dai Strassoldo-Grafenberg (Graffembergo), il çoc gurizan de famee. Cjase Strassolt e ospitave dispès amîs e parincj di lenghe todescje. La mari, Marion Oltay, e jere une ongjarese di Budapest; i doi si jerin cognossûts a Lussin, centri balneâr frequentât par tradizion dai citadins austro ongjarês. Sul imprin, i gjenitôrs si fevelavin tra di lôr par todesc. Cu lis gnocis, Marion e cjapà la citadinance taliane, e tant che femine di un uficiâl, al jere miôr che e fevelas te lenghe di Dante. Tai prins agns, la mari e fevelave cun Marzi sedi l'ongjarês che il talian, ma in curt e fo cheste ultime lenghe a prevalê e l'ongjarês al fo bandonât, ancje pal fat che la Ongjarie e jere restade sierade tal gulag sovietic.

Fin dal inizi (1939) i fîs a forin tirâts sù, par buine part, di une braçule che e viveve te famee (e che e restà plui di trente agns) e che duncje e jere une sorte di “vice mari”. Al fo di Ane (“Nute”) – nassude di une antighe famee contadine de Basse, i Comar – che Marzi al cjapà sù la lenghe furlane. Marzi al diseve di vê dôs marilenghis, a pâr: il talian e il furlan.

Il todesc al jere une seconde lenghe, cjapade sù in maniere ocasionâl, scoltant i discors dai “grancj” in taule, o te sale, e dilunc di dôs vacancis tes Gjermaniis; o cirint di capî chel che al jere scrit par todesc (e ancje in gotic!) tai cetancj libris che a jerin in cjase.

Cjapant par bogns i decrets de Storie, tal 1918 e tal 1945, i gjenitôrs no àn cirût di tirâ sù i fîs par todesc, ni di fâural imparâ tai cors formâi. Chest al vignì dome tai agns universitaris. Dut câs, la familiaritât evidente di Marzi cul todesc i fasè otignî subit un incaric volontari di “esercitadôr” te catidre di lenghe todescje te Universitât di Triest (cul prof. J. Nourney), tor la metât dai agns ’60. Ae fonde de sô tesi di lauree al jere un famôs autôr todesc, Walther Christaller. Nol covente dî che Marzi, dilunc dai siei studis academics, al à simpri podût doprâ tescj e seguî discors par todesc cence dificoltât.

Tes scuclis mediis e superiôrs, Marzi al studiave l’inglês, lenghe ben cognossude di ducj i doi i gjenitôrs – za in chê volte la paronance di cheste lenghe e jere un must pe int “sù”. L’ûs in famee dal inglês al aumentà une vore cuant che cierts parincj strents, dispatriâts de Ongjarie, daspò di jessi restâts par cualchi an a Strassolt, a emigrarin tai Stâts Unîts, e culî si naturalizarin. Cun lôr e tacà une corrispondence penze par inglês e si scambiarin cetantis visitis vicendevulis. Daspò dal riviell dal 1956, ancje la none ongjarese, aromai vedue, e lassà Budapest par vignî a vivi li de fie Marion, a Strassolt. Cu la fie e fevelave par ongarês, ma cui nevôts, a seconde, par talian, todesc e inglês (jessint une siore une vore “sù” e cognosseve ancje il francês). Cuant che i confins cu la Ongjarie si tornarin a vierzi, tor dal 1970, a tacarin visitis avonde frequentis cui parincj ongarês, dulà che si dopravin diviersis lenghis.

Naturâl che tes scuclis mediis e tes superiôrs Marzi al studiave ancje il latin e il grêc. La imersion, te infanzie e te prime zoventût, intun mont cussì siôr di lenghis lu puartà a infondî ancje a nivel sientific someancis e diferencis, origjins, evoluzions, gjerarchiis, misturis e v.i. tra lis lenghis. Al jere inmagât des teoriis su lis origjins comuns des lenghis europeanis (a part l’ongjarês) e de Indie, e dal teme dal sostrât celtic e retic des feveladis alpinis e padanis. Di chescj studis te adolescence no son vignudis fûr relations organichis, e inmò mancul publicazions; di sigûr, però, lis sôs competencis in materiis lenghistichis a vegnin fûr, cetant timp dopo, in cualchi so scrit su la storie antighe dal Friûl e in particolâr de Basse, dulà che si note une cierte sutilece tal tratâ problemis di trascrizions, di etimologjie, di toponims, e v.i.

2. Lis experiencis de zoventût. In gjenerâl, la gjenerazion che e je cressude in timp di Vuere e tal Dopovuere e à cognossût provis cetant duris. Marzi al à vude la sô part. I siei gjenitôrs, come ducj, a àn cirût di sparagnâi la durece di chei timps, e ancje dopo no le memoreavin. Dut câs, cualchi fruçon di chês vicendis al è vignût fûr. Par esempi, cuant che il pari al lavorave a Rome, tal Ministeri de Marine, a jerin timps di fan par ducj, il mangjâ nol jere, si veve di lâ a cirî tal marcjât neri e par meti dongje alc di pan e companadi si vevin di fâ meracui. Vie pal unvier dal 1944-45, invezit, si jere a stâ a Berlin e ogni dì si veve di cori tai bunker sot dai bombardaments. Cuant che la mari e scjampà cui doi frutins, il viaç in tren di Berlin fin in Friûl nol fo une bieie aventure. Intant, te cjase dai vons, e jere sucedude une tragjedie: un parint, un zovin di 18 agns, al jere stât tirât fûr dal jet in plene gnot e copât cuntune scjarie di mitra. La consequence a forin svindics trements tal paîs. Subit dopo, il cjâf de cjasade al murì, il so patrimoni al fo dividût tra i erêts e in pôcs agns la plui part e fo vendude par diviers motîfs. Cuant che il pari di famee, daspò di doi agns dispierdût te Gjermanie setentrionâl, al tornà, par rivâ a preparâ une cjase ae buine e a mantignî in maniere decorose la famee, al scugnì vendi, a tocs, i terens che al veve ereditât. Par vie de scarsetât di mieçs, nol fo pussibil, mandâ i fîs a studiâ in citât, intun coleç-convit, come che in chês volte e usave fâ la *gentry* di campagne. Marzi e il fradi plui piçul a forin mandâts a fâ lis elementârs te scuele dal paîs, che e veve dôs aulis par cinc classis, cun plui di 30 fruts par ognidune; ducj fîs di contadins, di cualchi operari e muredôr, e di un pâr di scriturâi. Po a forin iscrits tes mediis di Sarvignan, lontanis plui di 5 km di strade statâl, dulà che a vevin di rivâ cu la biciclete, cun ogni sorte di timp.

Po lis robis a tacarin a lâ in miôr, tal 1953 il pari al fo reintegrât te Marine e tal 1956 al cjapà servizi tal Comant di Vignesie, tal Arsenâl; i fîs a lerin tal Liceu Gjînasi “Marco Polo” di chês citât. L’an dopo il pari al fo trasferît a Ancone e, cualchi mês dopo, a Rome, te “Casa Militare” de Presidence de Republiche, tal Quirinâl, e i fîs a forin iscrits al “Mamiani”, tal cuartîr Prati. Finît il liceu, Marzi si iscrivè te Facoltât di Economie e Cumierç de Sapienza. Ancje cheste sistemazion e durà pôc, par vie che il pari al fo mandât al comant di Napoli; un an dopo al murì (1960), e ducj – la bare, la vedue e i fîs – a tornarin in paîs. E tacà une

altre fase di puaretât, che nol covente contâ achì tal detai. Al è avonde dî che si pative la fan e intant si lave indenant e indaûr di Triest cul tren, par finî di corse la Universitât, laureâsi e cjatâ prime pussibil un lavôr.

In curt: Marzi di zovin al à passât diviersis cundizions, in diviersis parts di Italie, simpri tes dificoltâts. Altri che il stereotip dal siôr che al passe la vite tal bonstâ, sierât dentri dai mûrs e dai fossâi dal so cjistiel, tra la Livence e il Timau! La veretât e je che Marzi al à simpri lavorât tant, cence limits di timp e cence distrazions. I siei consums privâts, il so “tenôr di vite”, a son simpri stâts une vore stratignûts.

3. Prime formazion politiche culturâl: liberalisim e monarchie. I agns de prime zoventût a forin segnâts no dome di privazions ma ancje di passions politichis, dai scuintris globâi, ma ancje locâi, tra ideologjîis e regjims, che a tocjavin insot la vite di ognidun. Scuintris che a jerin cetant vîfs in puescj come il Friûl, dulà che l’Occident “libar” al tocjave fisichementri l’Orient communist. Un come Marzi che al jere part di une famee teriere mitteleuropeane, di tradizion catoliche, e che mieze part di chê e pative i orôrs dal regjim stalinist, nol podeve che jessi anticomunist. La campagne elettorâl dal 1948 e fo memorabile ancje tal so paisut, dulà che “comuniscj” e “democristians” a jerin ducj i doi fuarts; ma i contracscj ideologjics no impedivin a lis dôs parts di vê un ciert rispiet fra di lôr. Ancje li di nô la situazion e jere compagne di chê dal “mondo piccolo” di Guareschi.

In famee no si fevelave plui di tant di politiche, e inmò di mancual a scuele, dulà che l’unic valôr che si insegnave al jere chel dal patriotisim talian e la storie e finive cu la Vitorie. Ma in cjase a jentravin i gjornâi locâi e ogni tant chei nazonâi; e diviers periodics (tant che *Oggi*, *Candido*, *Europeo*, *Epoca*, *Selezione* e *Il Borghese*). Su chês pagjinis si stave daûr ai dibattiments sul Plan Marshall, su la Nato, su la Ced, sui fermentis di riviell tal imperi sovietic, e po sul Mec; e su la dissoluzion dai imperis coloniâi europeans, la vitorie dal comunisim in Cine, la corse ai armaments e il terôr atomic. A jerin temis grandiôs e nol è ce maraveâsi se ancje i fantacins si appassionavin.

In cjase a jerin ancje libris sui orôrs dal comunisim; ma Marzi al fo atrat pluitost dai fondaments filosofics de ideologjie contrarie, ven a stâi

dal liberalisim; forsit in gracie ai studis dai tescj di Benedetto Croce. Al studià une vore chest teme te adolescence. Par cetancj agns il libri che al ste di plui su la sô scrivanie al fo chel di Guido de Ruggiero, Storia del liberalismo europeo (1924, tornât a stampâ plui e plui voltis tal dopo vuere).

Cheste passion inteletuâl lu puartà a concentrâsi ancje sul principi monarchic. Vuê, dopo plui di 70 agns dal referendum, e diviersis gjenerazions di inculture, cheste istituzion e somee alc che al pues dome fâ ridi; ma in chê volte monarchics a jerin i prins doi Presidents de Republiche, De Nicola e Einaudi; l'esponent plui grant dal liberalisim, Croce; almancul une buine metât dai talians; e cuasi ducj i membris dal Partît Liberâl Talian, dongje di cetancj esponents di tancj altris partîts. Ae sielte politiche di Marzi di sigûr no à contribuît la famee, par vie che in Italie jessi monarchic al voleve dî sostignî cjase Savoia, e i Strassolt, tal Votcent, i Savoia ju vevin combatûts in prime linie e, tal Nûfcent, a consideravin tradiments lis sieltis sabaudis dal 1915 e dal 1943. La infatuazion monarchiche di Marzi e nassè sui bancs dal "Stellini"; za te campagne eletorâl dal 1953 al jere impegnât a incolâ sui mûrs i manifestj dal Partît Nazionâl Monarchic. Sù par jù par 15 agns (1953-1967) al ve amîs impuartants tal ambient monarchic a nivel regionâl e nazionâl. Daspò de framentazion de aree monarchiche sul plan partitic eletorâl, tor il 1960, Marzi al restà atîf sul plan socio culturâl, lavorant te Union Monarchiche Taliane (UMI). In chest ambient al publicà cualchi articul e une monografie (*Monarchia e libertà in uno stato moderno*, 1967), che e fo preseade ancje di Umberto II.

4. Latence e tornade in politiche. Cu la laurea, ta chel stes an, Marzi al sierà par simpri la sô esperience politiche-culturâl monarchiche, che, dut câs, nol à mai taponât o dineât. Al jentrà intune seconde fase, lungje sù par jù come la prime, che si pues definîle di "latence politiche". Si impegnà te costruzion de sô cariere academice tal setôr de statistiche economiche: ricercjadôr tal 1969, associât tal 1980, straordenari tal 1986; simpri te Facoltât di Economie e Cumierç di Triest. In dut, come student e docent, Marzi al è stât in chê citât par 26 agns; duncje le cognosseve ben, ancje lis diferencis di caratar e di interès rispjet al Friûl.

Al à simpri tignude la residence tal so paisut furlan, dulà che aromai al veve creade ancje la sô famee (cun Ombretta Oliverio e il fi Ricart). Tant che President dal Consorzi dai Cjistiei al cognosseve tante int e tancj lûcs dal Friûl; e ancje come studiôs di statistiche economiche al fasè cetantis ricercjis sul teritori furlan; in particolâr su la a pene nassude Provincie di Pordenon (1968). Une vore impuartantis a forin lis sôs ricercjis (1975, 1979, 1989) su la domande di cors e facultâts universitariis in dut il Friûl Vignesie Julie, comissionadis dal Consorzi pe Universitât dal Friûl.

La latence e finì tor la metât dai agns '80, cuant che une grande opare publiche (la Stazion di Caric ferroviari di Sarvignan) e menaçà il teritori dongje di cjase, causant la nassite di un vivarôs comitât NIMBY, e e puartà Marzi a impegnâsi te arene partitiche aministrative locâl; cheste volte, cu la Democrazie Cristiane. Al fo elet tal Consei comunâl di Sarvignan (1985) e al lavorà pe costituzion di une sezion de DC tal so pâis, tornant a vivi la sô inclinazion pal “lavôr politic” plui pratic, te comunicazion di ideis, te coltivazion di rapuarts umans e te costruzion di consens; che po al caraterizà la ultime fase de sô vite.

5. Marzi furlan. Marzi al jere furlan, parcè che furlane e jere la sô famee, inlidrisade in cheste tiere di cuasi mil agns, e simpri presinte tal Parlament de Patrie dal Friûl. I tancj rapuarts, parintâts e esperiencis cul mont ator a nord est la insioravin, ma no alteravin la identitât di fonde de famee. Marzi al jere ancje furlanofon; ma chest al jere un trat comun. Di simpri, i nobii a fevelavin furlan cui lôr contadins, dialets venits cu la borghesie professionâl, comerciâl e impleade, talian cui leterâts e todesc cun chei dal stes grât tal Imperi; e dispès, un miscliçot di dut chest. Prime dal nazionalisim romantic dal Siet-Votcent, la lenghe no jere un trat assolût de identitât coletive. Marzi al amave il Friûl come tiere e come popul, a 'nt cognosseve la storie, la gjeografie, lis tradizions, la leterature, la culture; al leieve simpri lis publicazions de Societât Filologjiche Furlane. Ancje chest al jere normâl, te tradizion dai Strassolts, come di tantis altris fameis de stesse classe sociâl. Marzi al jere ancje braurôs dai siei vons che a vevin scrit par furlan, come Joseffo e in mût particolâr di un altri Marzi, che dongje di jessi stât un protagonist de culture dal

Sietcent a Gurize e di vê cjàpât posizions ideologjichis ben definidis, al veve ancje publicât poesiis par furlan. Ma fin a no tant timp indaûr Marzi nol jere un furlanist, o ben nol jere cjàpât tai moviments politics pe rivendicazion di plui autonomie pal Friûl storic, devant no dome dal Stât talian ma ancje devant de Regjon Friûl Vignesie Julie. Te sô famee no si à mai fevelât dal autonomisim furlan de prime fase (1945-1953), cuant che il probleme plui impuartant al jere di contignî il comunisim; e pôc de seconde fase (dal 1966 al 1972), cuant che Marzi al jere impegnât a finî i studis a Triest, a inviâ la sô cariere e in altris impegnis privâts.

Come tancj altris, Marzi al sintì une vore il jessi furlan cul taramot dal 1976. Al partecipà cun entusiasim ae ricercje su la “cundizion socio-lenghistiche dal Friûl-Vignesie Julie” (1977-78), che e jere un dai tancj risultâts dal taramot, e al fo content che la lenghe furlane e jere inmò in bon stât. L’implant metodologjic doprât di Marzi in chê ricercje al vignì replicât in tantis altris ricercjis dai agns daspò (1986, 1998, e v.i.). Dut câs Marzi nol jentrâ tal autonomisim furlan, sedi pe paralisi dal Moviment Friûl, tai dîs agns dopo dal taramot, sedi parcè che chei vignûts dopo dal Moviment Friûl a spesseavin dome a barufâ. Marzi al lassà che a partecipâ a chês vicendis al fos il fradi piçul.

6. Marzi Strassolt Retôr de Universitât di Udin. L’amôr pal Friûl al vignì fûr in concret cuant che, clamât tal 1987 ae Universitât di Udin, al decidè di lassâ Triest, dulà che si jere creât un ambient une vore positîf. A Udin, cetancj docents a forin dacuardi par nomenâlu Retôr dal ateneu: biadelore un furlan “doc”, dopo altris che a vignivin di fûr regjon. Marzi, di bande sô, al crodeve che la Universitât di Udin e ves vût di diventâ pardabon la Universitât dal Friûl, come che al veve domandât il popul furlan (cu lis 125.000 firmis dal 1976), e come che al jere codificât tal art. 26 de leç istitutive de Universitât: “contribuì al progrès civîl sociâl e ae rinassite economiche dal Friûl e di diventâ imprest organic pal disvilup e il rinovament dai filons originâi de culture, de lenghe, des tradizions e de storie dal Friûl”.

Chel che al à fat Marzi pe Universitât di Udin, tai undis agns che al è stât ae vuide dal Ateneu (1990-1992 come pro retôr vicjari, 1992-2001 come retôr) al è evident par cui che al à vivût chei agns te Universitât, e

par cui che al à let i tancj preseaments publicâts inte ocasion de sô muart (ai 5 di Zenâr dal 2017) e lis tantis biografiis vignudis fûr dopo.

Marzi al capì, al metè in vore e adiriture al anticipà lis leçs di riforme de autonomie, dal 1989 indevant, dal sisteme universitari cuntune schirie di regolaments tai diviers setôrs dal ateneu e tal 1993 la aprovazion dal gnûf Statût; al completà la riorganizazion dai uficis centrâi e de ricercje in dipartiments e centris interdipartimentâi; al invià la riforme dai curricula (lauree trienâl, lauree magjistrâl, master, dottorât), dal sisteme dai credits formatîfs e il sisteme dai cors obligatoris trasversâi e gjenerâi (inglês, informatiche, imprenditorialitât, comunicazion); al inserì lis proceduris di valutazion de cualitât dai insegnaments e de produzion sientifiche; al istituì dôs gnovis Facoltâts (Jurisprudence tal 1996 e Formazion Primarie tal 1998), la Scuele Superiôr (inviade tal 1992), il Centri di brevetazion dai risultâts de ricercje (1995) e altris uficis (Relazions cul public, Orientament e Tutorât, Garant e v.i.).

Dutis lis ativitâts aministrativis a forin digjitalizadis. Marzi al ideà e al invià organisims di coordinament tra la ricercje universitarie e lis “esigjencis dal teritori”, tant che “Friuli Formazione” (1995) e “Friuli Innovazione” (1999), o ben il Parc Sientific Tecnologicj di Cjargnà. Al fondà la cjase editorie universitarie Forum par favorì la publicazion des ricercjis dal cuarp academic di Udin.

L'impegn di Marzi al ve risultâts incredibii: dilunc dal so mandât i students a passarin di 9.282 a 15.400 e la Universitât e rivà tes primis posizions in cetantis classificjis e indicadôrs nazionâi.

Tai siei plans Marzi al veve simpri iniment i interès dal Friûl. Ju difinì dai moments di coordinament tra lis Universitâts di Udin e Triest, ma nol rivà a comedâ il scuilibri tra i doi ateneus te ripartizion ministeriâl dai finanziaments. Al vierzè centris universitaris a Gurize, a Cormons, a Glemone, a Pordenon; sedì par vignî incuintri aes exigjencis locâls sedì par infuartì la unitât dal Friûl. Al cirì di fâi cuintri ae politiche di Triest te “invasion” dal Friûl. Al clamà a Udin studiôs di origin furlane che si jerin afermâts in altris sedis. Al curà la publicazion di impuartants studis su la storie e sul stât de Universitât dal Friûl.

In aplicazion dal art. 26, tal 1995 Marzi al rivà a istituì il Centri Interdipartimentâl pe Culture e pe Lenghe Furlane (CIRF). Dut câs

al saveve ben che e mancjave sensibilitât e cognossince di bande dal cuarp academic sui valôrs furlaniscj e soledut de ostilitât che tancj “barons” a mostravin viers chei valôr. Par otignî la aprovazion dal Senât al CIRF al scugnî movisi ben planc, cun prudence par no di cun furbetât¹. Invezit, Marzi al capî che no si podeve otignî di cambiâ il non de Universitât di “Udin” a “Friûl”. Tal 2002 e tal 2004 il CIRF al fasè dôs ricercjis su la disposizion e su lis opinions dal personâl docent e tecnic aministratîf e dal cuarp dai students sui temis furlaniscj. I risultâts a mostrarin che dome pôc plui di un cuart, sedi di chei sedi di chei altris, a jerin, in cualchi misure, a pro de “furlanizazion” dal ambient universitari².

7. Marzi Strassolt President de Provincie di Udin. La prossimitât al mont furlanist e vignive fûr in dute la sô ativitât. Tal 1995 al veve acetât di fâ di president di un comitat par domandâ une seconde e plui juste sede de Rai a Udin. Tai agns dopo al patrocinà une iniziative politiche, di marcje furlaniste catoliche, par presentâ une sô liste aes elezions regjonâls dal 1998. I siei sostignidôrs a batevin par che al acetàs ancje la candidature come cjâf liste; ma lui nol molà: al veve prime di finî il so mandât te Universitât³. Dome ae fin dal tierç mandât al acetà la candidatura ae Presidence de Provincie di Udin, come indipendent e autonomist intune maiorance di centri drete. Tornât a presentâsi la volte dopo (2006), al vincè cul 57,8% dai vôts.

Lis ativitâts di Marzi in cheste sô gnove incarghe a forin segnadis de difese de unitât e de dignitât dal Friûl devant de Regjon “Friûlvignes-iejulie”, simpri plui centralistiche e in chês volte vuidade dal ex sindic di Triest Riccardo Illy. Al scombateve pe adozion dal model Trentin-Sudtîrôl: svuedâ la Regjon e dâ responsabilitâts, competencis e risorsis aes Provinciis.

In cheste prospettive al rivà a creâ la assemblee des Provinciis dal Friûl, ma Gurize no aderì pes resons che si san. Al disfà il tentatîf di Illy di spacâ la Provincie di Udin cu la istituzion de “Provincie de Cjargne”. Convint che il status di specialitât de Regjon si fonde su la presince des minorancis lenghistichis al lavorà a pro de lôr tutele e promoziun, in particolâr de lenghe furlane. In cheste linie al creâ te strutture de Provincie

une Direzion fuarte, al de contribûts, al organizà cunvignis impuartantis e mostris e al fasè publicâ libris preseâts.

Al acetà ancje la incarghe di President di Ente Friuli nel Mondo (2003-2006), dulà che si spindè cence padin, sedi tes visitis ai Fogolârs in diviersis parts dal mont sedi tal difindi l'Ent di acusis (po coladis tal nu-
ie) di coruzion, malversazions e altris malefatis aministrativis. Ancje chi al jere clâr che daûr e jere la manute “unitariste”, che e cirive di sdrumâ ogni fonde furlaniste.

L'ativisim e la eficacitât di Marzi su chestis liniis al fasè nassi tal mont autonomist la idee di proponilu come “governadôr” tes elezions regionâls; ma al de ancje l'alarme aes fuarcis unitariis, centralisticis e antifurlanistis, presintis in ducj i partîts e soledut te stesse Udin. La cres-
site di Marzi e fo çoncjade tal 2007 cuntune classiche manovre giudiziarie mediatiche e al fo acusât, cun grant scjas sul gjornâl di Udin, di une schirie di scandui: suspiets sessuâi, abûs di ufici, coruzion, scambis di vòts e v.i. I partîts de sô maiorance lu bandonarin e, no cate lis sôs protestis di inocence, lu oblearin a dimetisi. Cinc agns dopo Marzi al fo declarât inocent ma intant la sô cariere politiche e jere disfate, cussì come la sô situazion finanziarie familiâr.

8. I ultins agns. Il caratar di Marzi al jere stât temperât des sôs esperien-
cis di zovin. Intant che al scombateve tra avvocats e judiçs par dimostrâ di jessi inocent, al tornà a lavorâ pal Friûl; e chest al voleve dî ancje tornà a strenzi leams cu lis fuarcis politicis che lu vevin tradît. I derin confuart i siei coleghis de Universitât che a vevin subit capît che i scandui a jerin dome caluniis; e inte ocasion dal so pensionament (2009) i derin tantis e comoventis testimoniancis di stime te Aule Magne di vie Tomadini. Al puartà indevant dôs iniziativis che al veve imbastît za di cualchi an: une e jere la Societât Sientifiche e Tecnologiche Furlane, cu la sô riviste; chê altre e jere la associazion culturâl *Identità e Innovazione* e la riviste *Autonomie*. Al curà cun atenzion la strutture de associazion, i siei comitâts locâi, lis sôs iniziativis (cunvignis e v.i.), lis sôs proceduris formâls. Te suaze di cheste experience si proponè cuntune sô liste pes elezions regionâls dal 2008. Tai ultins agns al mandave indevant cuasi dal dut di bessôl il bimensîl on line *Gnovis* (40 numars) dulà che al publicave

i risultâts dai siei lavôrs sui diviers problemis dal Friûl; un corpus une vore ampli. Al puartà insom la ricercje, tacade diviers agns prime, su *Economia delle minoranze linguistiche: la tutela della diversità come valore* (Carocci, Rome 2016).

Tai ultins agns al scombatè par contrastâ in maniere sientifiche la campagne cuintri la “Caste”, soredut tai confronts de istituzion Provincie. Al le cuintri de riforme costituzionâl puartade a referendum tal 2016. No cate un probleme fisic tai prins mès dal 2016, par dut l’an al lavorà a pro di cheste cause. Ai 21 di Dicembar al jere inmò in place Sant Jacum a Udin a svintulâ la bandiere, gloriôs che al ves vint il NO.

Cutuardis dîs dopo nus lassave, maçât di un mâl esplosîf.

¹ Il fat al è contât in Strassoldo R. (2012). *Una vita da friulano. Contributo alla storia del movimento autonomista*. Cjampfuarmit: Ribis, p. 200 ss.

² Picco L. (2013). *Lingua friulana e società: studi sociolinguistici sul Friuli di oggi*. Udin: Forum.

³ Su chest fat cfr. Strassoldo 2012, p. 140 ss.